

佛說法滅盡經

僧祐錄失譯人今附劉宋錄



南無本師釋迦牟尼佛

說明

本繁體校正版《佛說法滅盡經》電子書，根據《乾隆大藏經》大乘單譯經，第 0466 部，《佛說法滅盡經》原藏影印本校正，句讀僅供參考。

本電子書是免費結緣品，特此說明。

仁慧草堂

二〇一九年一月



掃碼關注仁慧草堂微信公眾號

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

佛說法滅盡經

僧祐錄失譯人今附劉宋錄

聞如是：

一時，佛在拘夷那竭國，如來三月當般涅槃，與諸比丘及諸菩薩。

無央數眾，來詣佛所，稽首于地，眷屬圍遶，渴仰聞法。世尊寂靜，默無所說，光明不現。

賢者阿難作禮白佛言：「世尊前後說法威光獨顯，今大眾會光更不現，何故如此？必有緣故，願聞其意。」

佛默不應，如是至三。

佛告阿難：「吾涅槃後法欲滅時，五逆濁世魔道興盛。魔作沙門壞亂吾道，著俗衣裳，樂好袈裟五色之服，飲酒噉肉，殺生貪味，無有慈心，更相憎嫉。

「時，有菩薩、辟支、羅漢精進修德，一切敬待，人所宗尚，教化平等，憐貧念老，救育窮厄，恒以經像令人奉事，作諸功德，志性思善，不侵害人，捐身濟物，不自惜己，忍辱仁和。設有是人，眾魔比丘咸共嫉之，誹謗揚惡，擯黜驅遣，不令得住。

「自共於後不修道德，寺廟空荒無復修理，轉就毀壞。但貪財物，積聚不散，不作福德。販賣奴婢，耕田種植，焚燒山林，傷害眾生，無有慈心。奴爲比丘，婢爲比丘尼，無有道德，淫泆濁亂，男女不別，令道薄淡，皆由斯輩。

「或避縣官，依倚吾道，求作沙門，不修戒律，月半月盡雖名誦戒，厭倦懈怠不欲聽聞，抄略前後不肯盡說。經不誦習，設有讀者，不識字句，爲強言是，不諮明者。貢高求名，虛顯雅步以爲榮冀，望人供養。

「眾魔比丘命終之後，精神當墮無擇地獄，五逆罪中餓鬼、畜生靡不經歷，恒河沙劫罪竟乃出，生在邊國無三寶處。

「法欲滅時，女人精進，恒作福德；男子懈怠，不用法語，眼見沙門如視糞土，無有信心。法將殄沒，當爾之時諸天泣淚。水旱不調，五穀不熟，疫氣流行，死亡者眾。人民勤苦，縣官尅罰，不順道理，皆思樂亂。惡人轉多如海中沙，善者甚少若一、若二。

「劫欲盡處，日月轉促，人命轉短，四十頭白。男子淫泆精盡天命，或壽六十。男子壽短，女人壽長，七十、九十或至百歲。

「大水忽起卒至無期，世人不信故爲有常。眾生、雜類無有豪賤，沒溺流飄，魚鼈食噉。

「時有菩薩、辟支、羅漢，眾魔驅逐不與眾會。三乘入山福德之地，恬怕自守以爲欣快，壽命延長，諸王衛護，月光出世，得相遭值，共興吾道五十二歲。

「首楞嚴經、般舟三昧，先化滅去；十二部經尋後化滅。聖王去後，沙門袈裟自然變白。

「吾法滅時，譬如油燈，臨欲滅時，光更明盛。吾法滅時，亦如燈滅。自此之後，難可數說。

「如是之後數千萬歲，彌勒當下世間作佛，天下泰平，毒氣消除，雨潤和適，五穀滋茂，樹木長大，人長八丈，皆壽八萬四千歲，眾生得度不可稱計。」

賢者阿難，作禮白佛：「當何名斯經？」

佛言：「阿難，此經名爲法滅盡，宣告一切宜令分別，功德無量不可稱計。」

四部弟子聞經，悲慘惆悵，皆發無上聖真道意，悉爲佛作禮而去。

佛說法滅盡經

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

補闕圓滿真言

(三編)

唵. 呼嚧呼嚧. 社曳穆契. 莎訶

普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉
嚩吽

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無觀世音菩薩摩訶薩 (合掌三稱)

南無護法諸天菩薩 (合掌三稱)

禮佛發願文

(一編)

歸命十方調御師 演揚清淨微妙法
三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤。仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉痾；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

迴向偈

(一編)

願以此功德 普及於一切
我等與眾生 皆共成佛道

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；
自皈依僧，當願眾生，統理大眾，一切無礙。和南聖眾。

南无护法韦驮尊天菩萨



此咒置經書中可滅誤跨之罪